

·cienlanz sawcuenb·

Hoh Loz Lauxsae Mwngz Seizheiq Ndei

祝罗老师你好运

□Siz Bungzcwngz/石鹏程

Ciengzseiz dingq Loz lauxsae nam naeuz: “Danghnaeuz gou hawj Daegngeih gvih roengzdaeuj baiq geij baez le, de couh ndaej boiz gij cienz daigvanj sinyungse haenx, gou hix cingznyiengh gvih ha!” Seizneix bakdou ranz Daegngeih gaenq maj gij nywj rim liux, diuz loh neix geijlai sug ha! Gij va geijlai ronghsien ha! Sien ndaej lwenqda, sien ndaej hawj vunz simlueh dangqmaz! Song bi lo, song bi neix daeuj Loz lauxsae itcig cij ndaej youq didanh cawx gij ien ma cit, sinyungse gaeu gij cienzhong Loz lauxsae bae boiz leihsik, aeya, cungj saedceij neix seizlawz cij daengzgyaeuj ha? Cungj saedceij neix seizlawz cij sat ha? Loz lauxsae byoq gaemz hoenzien ndeu, ngauz gyauej mbouj dingz.

Song bi gonq haemh ndeu, mbwn laepsaengsaeng, iet fwngz mbouj raen saek cik lwgfwngz. “Dinghdoengh! Dinghdoengh!” Aen lingz bakdou Loz lauxsae yiengj lo, baenzneix hwnz lo, dwg bouxlawz ne? Loz lauxsae lumh aen gyauej ngeix. Baez hai dou, raen dwg Daegngeih ndwn youq bakdou, de riunyumnyum dwk, fwngz ndeu riuj byaekcug, fwngz ndeu riuj ien caeuj laeuj, naeuz: “Loz daeggo, baenzlai nanz mbouj raen mwngz lo! Haemhneix raeuz caez ndoet laeuj! Danghnaeuz mbouj miz maz saeh itdingh mbouj daeuj ranz mwngz ha!” “Ndei ha! Haeujdaeuj, haeujdaeuj caiq gangj!”

Daegngeih dwg caencik Loz lauxsae, caen daengz maz cingzdoh lienz gyoengqde hix gangj mbouj cingcuj. Haeuj ranz le, faen bouxcawj bouxhek naengh roengzdaeuj, hai bingz laeuj gwn, gangj gij goj ndaw ranz. Ndoet geij boi le, Loz lauxsae naj hoengzfwdfwd, Daegngeih youh ndenq ci ien Hungzdazsanh gvaqdaeuj, siujsim yubyub dwk bang Loz lauxsae diemj feiz. “Gou gag diemj, gou gag

diemj!” Loz lauxsae sawqmwh ndaej yiengjsouh gij daiyi baenzneix ndei, lij gamjdaengz miz di mbouj gvenq, sikhaek vad fwngz dwk naeuz.

Sing “budoengh” ndeu, Daegngeih gvih youq baihnaj Loz lauxsae: “Loz daeggo, gouqmingh ha! Cien dub fwngz lo! Gouz mwngz bang gou gvaq aen hamj neix a!” Loz lauxsae caengz raen gvaq cungj cingzgingj, gipmuengz fuz Daegngeih hwnjdaeuj naengh youq gwnz daengq, naeuz: “Miz maz gunnanz, gangj okdaeuj, raeuz dwg beixnuengx, gou miz naengzlig bang itdingh bang mwngz!”

Daegngeih lae raemxda mugmug myaizmyaiz dwk gangj gij gunnanz duenh neix ngamq bungz daengz. De naeuz ndaw ranz ciengx 100 lai duz mou, seizneix aenvih mbouj miz cienz cawx liuhgueng hawj duzmou gwn, duzmou cungj byom liux, lij miz song duz yaek dai lo! Seizneix gip aeu cienz bae cawx liuhgueng daeuj gueng. Loz lauxsae naeuz: “Ndaej caeuj aen diemqliuhgueng sisog gonq ha!” Daegngeih naeuz: “Mbouj ndaej sisog daiq lai, diemqliuhgueng hix miz gvidingh, gij liuhgueng 100 lai duzmou gwn mbouj suenq noix!” Loz lauxsae dingq le couh naeuz: “Gou dwg baux lauxsae, moix ndwen cienzhong 1000 lai maenz ngaenz, mbouj miz cienz ciq hawj mwngz.” Daegngeih naeuz: “Loz daeggo, gou mbouj ciq gij cienz mwngz, gou ciq sinyungse, seizneix dan noix bouxvunz daeuj danbauj, gouz mwngz youq mbaw ciqcienz giz bauxdanbauj ciem aen mingz mwngz, caiq yaenq aen yaenqfwngz mwngz couh baenz lo!”

“Ndei ha!” Loz lauxsae mbouj

cai q gangj maz lo, bouxwnq mbouj ciq cienz de, gauj fuyez bungz daengz gunnanz, miz naengzlig bang couh bang lo, dan ciem aen mingzcoh, caiq yaenq aen yaenqfwngz ndwi, neix miz maz nanz.

“Ngoenzcog couh bae banh gienh saeh neix!” “Ndei!” “Loz daeggo caen dwg baux seuqsang!” Daegngeih dauq loh ok najriu lo.

“Ndoet liux!” “Ndoet liux!” Song aen boilauej angqyangz dwk doxbungz youq giz ndeu.

Ngoenz daihngeih youq gwnz haw ndaw sinyungse, Loz lauxsae youq gwnz sawdanbauj seuqdangq dwk sij gij mingzcoh swheij, lij yaenq aen yaenqfwngz saek hoengz dem. Daegngeih aen fwngz yub myaiz, geq dab cienz nanup, cingqngamj 3 fanh maenz! 3 fanh ha, Loz lauxsae gunghcoz baenz lai bi hix caengz raen gvaq baenzlai cienz ne! Daegngeih gaem fwngz Loz lauxsae naeuz: “Daeggo ha, daeggo caen gou ha! Aenvunz gou ha!” Loz lauxsae naeuz: “Gaej gangj lo, ndaej bang couh bang mwngz!”

Gvaq geij ndwen ngoenz ndeu, lij dwg youq ndaw sinyungse, Loz lauxsae bae lingx cienzhong. “Doiq mbouj hwnj, ndaw cunzcez mwngz mbouj miz baenzlai cienz.” Gunghcoz yinzyenz naeuz. “Mbouj dwg fat cienzhong la?” “Fat lo, hoeng mbaw cunzcez mwngz deng dingz lo, gij cienzhong mwngz deng dawz bae boiz leihsik caez!” Aen gyauej Loz lauxsae “hoengh” yaep he, rox dwg aenvih maz lo, sikhaek daj soujgih Daegngeih. “Daegngeih ha, gij cienz mwngz ciq sinyungse leihsik deng gou boiz? Mwngz nanzdauh

mbouj boiz leihsik ha?” “O, dwg mwngz ha Loz daeggo! Gou seizneix dawz mou daeuj Gvangjdungh baihneix gai, gai ndaej cienz le caiq boiz mwngz! Cuengqsim ba! Seizneix gou lij muengz, couh yienghneix, caiqraen!”

Loz lauxsae dingq le siengj: Lwgmbauq neix vihmaz buet bae Gvangjdungh gai mou ne? Baihneix dou miz baenzlai baux buenqmou!

Bae mbanjranz Daegngeih baez cam, Loz lauxsae couh gyad naengh youq rog dou ranz Daegngeih gven dwk haenx. Vunz ndaw mbanj naeuz: “Daegngeih ciengx mou? Caengz ndaejnyi gangj gvaq, ‘max’ dauq doj gvaq geij baez, hoeng cungj dai caez, dingqnaeuz saw bae cibgeij fanh ne!” Loz lauxsae seizneix cij menhmenh singj gvaqdaeuj, youh daj soujgih Daegngeih, gvengih lo.

Daj seizhaenx hwnj, gij cienzhong Loz lauxsae deng gaeu bae boiz sinyungse lo, ndwen cienzhong ndeu ngamq gaeuq boiz gij leihsik 3 fanh maenz aen geiqdoh ndeu, saedceij gvaq ndaej gig hoj. Daegngeih gvai lai lo! Loz lauxsae ndaq mbouj dingz! Loz lauxsae ciengzseiz daeuj henz ranzvaih Daegngeih baenq bae baenq dauq, maqmuengh yawjraen miz gij saeh geizheih fatseng, roxnaeuz dwg yawjraen gungxcienz ranz Daegngeih haem miz gang cienz ndeu, roxnaeuz dwg yawjraen Daegngeih naengh youq ndaw ranz caj de daeuj aeu cienz, hoeng baezlawz cungj doeknaiq dauqma.

Geij ngoenz gonq gou youq Mbanjluzhu bungz raen Loz lauxsae, de naeuz dingq baux daj baihnazm guh hong ma naeuz Daegngeih mbouj rox guh maz fatcaiz lo, bi moq ndwencieng dauqma ranz couh lienz bonjcienz caeuj leihsik itheij boiz liux bae.

Gou riuriu mbouj gangj maz, cijdwg youq ndawsim naeuz: Hoh Loz lauxsae mwngz seizheiq ndei!

Gij Cingz Baen Mbawceij Hawj Gou He

一份分给我纸张的情谊

□ Vangz Fungmingz / 黄凤明

40 bi daeuj, miz haujlai saeh gou cungj geiq mbouj ndaej lo. Hoeng, miz gij cingz mbawceij haenx gou cungj lumz mbouj ndaej.

Bihaenx gou ngamq doeg siujyoz haj nienzgaep. Baez ndeu singhgizsam banhaet, Vangz yaucangj daiq gou bae camgya cungh siuj hagseng suhfaz doxdax.

Baez haeuj ndaw gaujczangz, baux genhgauj lauxsae naeuz: “Gak baux senjsouj, baezneix doxdax aeu gag daiq ceij, neiyungz gag dingh, sou dwg daibyauij gak aen hagdzangz daeuj doxdax, aeu gauj ok cwngzciz ndei di a.” Ya! Baenzlawz guh a? Gou cij daiq gonj bit ndeu daeuj ndwi, mbouj daiq ceij gvaqdaeuj. Gou dwg daibyauij hagdzangz daeuj neix doxdax, danghnaeuz…… Gou simgip dangqmaz, raemxda couh yaek lae okdaeuj le.

Seizhaenx, aen hagdzangz wnq dah senjsouj nienzgeij caeuj gou doxlumj ndeu yawjraen gou yienghneix, couh gangj vah nai gou: “Dah nuengxningq, mwngz vihmaz yaek daej?” Gou lwnh gij cingzgvang hawj de, de riu naeuz: “Mbouj youqgaenj, gou daiq haujlai mbawceij daeuj, gou baen mbawceij hawj mwngz sij.” Gangj sat de youq ndaw daeh baengz gek aeu geij mbawceij okdaeuj ndenq hawj gou.

Seizhaenx, gou yawjraen ndang dah haenx reuxringring, naj de luenzlili lumj namzgva, noh de haumbepmbep lumj gyaeqhau…… Ciep aeu mbawceij le, gou gamjdoengh dwk raemxda lae okdaeuj, gou lij gikdoengh dwk naeuz: “Dahcej, docih mwngz!” “Mbouj miz maz, bauxwnq miz gunnanz, yawjraen couh wngdzang bae bang.” De unqrad naeuz.



Seizneix, ndaw gaujczangz geijcib doiq lwgda cungj ndomq song dou, ciepröengzdaeuj, dahcej haenx dawz bit okdaeuj haindu j sij saw. Gou hix haeujsim sij: “……Aen vaengz Dauzvahdanz laeg cien cik, beij mbouj hwnj gij cingz Vangh Lwnz……”

Seizgan gvaqbae vaiq lumj naq, doxdax sat lo. Gou caeuj dahcej mbouj rox naj neix yaek doxbiek lo, ngoenzneix, gou gyo dahcej neix baen mbawceij hawj gou camgya doxdax, ndawsim gou angq baenz maz bae, aenvih de mboujdan soengq mbawceij

hawj gou, engq youqgaenj dwg de son gou baenzlawz guh vunz.

Cibgeij ngoenz gvaqbae, doxdax gezgoj okdaeuj lo. Gou gawqyienz ndaej mingz daih’it, ndaw fwngz gou gaem mbaw cwngsuh gamjdaengz naeknengneng, ndawsim gou ngeix naeuz: Yienznaeuz gij ciengj neix dwg gou yungh rengz bae lienh saw ndaej daeuj, hoeng, lainoix hix miz gij goenglauz baux senjsouj youq gwnz gaujczangz baen mbawceij hawj gou. Mwngz naeuz, gou baenzlawz ndaej lumz gij cingz de ne?